

西明叢書

張宗祥



杜莘老字起萊青神人少陵十三世孫也累官殿中侍御史後以直顯謨閣知遂寧府嘗歎曰臺諫當論天下第一事若有所畏姑言其次是欺其心不敬其君者也及任言責極言無隱都人稱骨鯁者必曰杜殿院云

姓譜

附錄

孝宗受禪公著三議以進曰定國是曰修內政曰養根本理切而事核殆無一語虛設

安撫張于湖先生孝祥

詳見衡麓學案

郡守張先生朱卿

張宋卿字恭父博羅人以春秋魁南省擢紹興初進士
第除祕書省正字遷校書郎正色立朝權貴欲納者謝
絕之由是名重搢紳終肇慶守

姓譜

忠肅金先生安節

金安節字彥亨休寧人資穎悟日記千言博洽經史尤
精于易宣和六年由太學權進士第調洪州新建縣主
簿紹興初范宗尹引爲刪定官入對言司馬光以財用
乏請用宰相領總計便宜以爲法除司農丞又遷殿中
侍御史秦檜兄梓知台州先生劾其附麗梁師成梓遂

罷檜銜之未幾丁母憂去遂不出檜死起知嚴州累遷
禮部侍郎給事中龔淵曾覲以潛邸舊恩隆興改元並
除知閣門事宰相知先生必以爲言使人諷之曰若書
行卽坐政府矣先生拒不納封還錄黃潛以舊人李珂
擢編修官先生又奏罷之上諭之曰朕知卿孤立無黨
張魏公聞之語人曰金給事眞金石人也拜兵部侍郎
已而請祠得請中書舍人胡銓繳奏謂安節太上之舊
人而陛下之老成也漢張蒼唐張柬之國朝富弼文彥
博皆年八旬尙不聽其去安節膂力未愆有憂國心豈

宜從其引去上遂留之踰年權吏部尙書兼侍讀自是力請謝事詔以敷文閣學士致仕乾道六年卒年七十七累贈開府儀同三司少保先生至孝居喪有禮與蔡檜忤不出者十八年及再起論事終不屈人以此服之有文集三十卷奏議表疏周易解 宋史

梓材謹案先生孫文剛爲先生家傳云諡忠肅貫通經史尤精于易學者多宗之

附錄

周益公跋金尙書撰陳丞相誌銘藁曰吏部徐侍郎度爲某言政和宣和間後生少讀史一日沈狀元晦以博

學至京師東南士子翕然宗之來者滿門聞舉古事莫不竦聽惟公在下坐數搖其首鄉人間故則云某事誤矣某事非也退而考按信然蓋公于史傳皆能默記叩之往往成誦迄今不以史書自隨其學可知矣

提刑詹先生至

詹至字及甫嚴州人崇寧元年進士歷官江淮招討使司隨軍轉運副使知常州改徽州張忠獻公辟州督府主管機宜文字以幕府功除直祕閣遭內艱服闋知處州時忠獻公去國和議興言者希時相意論先生與諸

將善坐是罷起爲永興等路提刑復丐祠以歸先生于書無所不讀讀輒不忘務以躬行爲主考論禮樂制度往往得經意尤喜推原歷代治亂得失之故有瀛山集十卷從子儀之從南軒講學

張南軒集

奉議徐先生淮

徐淮字佑元信之永豐人父年八十六以慈寧皇太后壽八十恩授右承奉郎致仕母年亦稱是封孺人先生嘗作雙榮堂莆田鄭厚記之再薦春官爲禮經第一初任鄂州教授銳意簡諒有鄒魯風鄉人流寓者咸加訓

勵累改宣教郎差除諸王宮大小學教授遷奉議郎上
起魏國張公總戎閩外先生乃草儒將書數千言盡古
今用儒之效上之政府意蓋欲任魏公之專又獻五啟
八劄皆切中時病政府偉其才

胡澹庵集

趙張同調

補

獻肅陳邦彥先生良翰

獻肅遺文

臣願陛下專以剛德爲主核名實之當示黜陟之公則
賞罰明矣進廉靜純實之人退浮躁銜露之士則風俗

正矣嚴撙節之制去冗食之員則財用節矣除繁密之禁申簡易之條則號令一矣持之以堅行之以久將見朝廷之政穆穆而迓衡海隅之民皞皞而擊壤中興之業自此可成矣

論剛德疏

附錄

知慈溪縣事歲凶民饑公喻富室發廩以糴籍貧民授券以糴上安下濟邑人賴之

召對東華門賜坐從容訪以治道公論士大夫苟且欺誕之弊及江湖荒政甚悉上皆納之

公質實無僞莊毅有守而色和氣溫不露節角人有片善稱歎不已小有不善必面規之

自寒素至通顯奉食如一日內艱後不復入私室用度悉出祿賜未嘗問產業

誨督子弟接誘後進孜孜不倦

公嘗爲人言先儒有論爲貧之仕者曰俟吾之饑餓不能出門戶也而後計之此孫言也而聽者不喻則其弊將無所不至夫饑餓而不能出門戶則死而已矣尙何計之爲哉

葉水心台州學祠三老堂記曰方靖康憂恐懲艾已泮
豈不尙合陳侍郎公輔發明四肢心腹之論無過此矣
竟失指遠去然後徬徨宗周卒成分裂之禍及隆興英
睿憤激大勢宜若遽振陳詹事良翰力守絕和不棄地
之策最專一使堅忍持之敵自當蕩析豈遺種至今哉
雖紹興復用而已與大臣異議終不留雖乾道再入而
旣爲近習擅事迄自退二公立朝本末天下誦之豈惟
不畔道而固行道道雖難行而亦不苟榮其身而止也

梓材謹案侍郎不右程子學
術終不可與詹事同日而語

補修撰芮國器先生煜

附錄

朱子與先生書曰竊聞學政一新多士風動深副區區之望但今日學制近出崇觀專以月書季考爲陞黜使學者屑屑然校計得失于毫釐間而近歲之俗又專務以文學新奇相高不復根據經之本義以故學者益驚于華靡無復探索根原敦勵名檢之志大抵所以破壞其心術者不一而足蓋先王所以明倫善俗成就人材之意掃地盡矣惟元祐間伊川程夫子在朝與修學制

獨有意乎深革其弊而當時咸謂之迂闊無所施行今其書具在意者後之君子必有能舉而行之區區願執事少加意焉則學者之幸也

陳止齋祭之曰欲從先生游十年于茲蓋亦數相遭卒幸相親也而受教不少延何哉天耶人耶自知求師友所得于天下纔數人耳去年哭劉莆田今年哭祭酒彼壽考者何限胡爲于我師友頻歲而忽焉亡耶且賢者縱不得大用獨不可留限遺吾黨耶

周益公祭之曰惟公之德渾厚正直惟公之才恢闔俊

軼克孝且友其秉也天勇于蹈義則由學然發爲詞章
登唐及漢著于議論弗蹈中訕仕有險夷道從礚緇從
容周行譽聞孔歸君子所持而亦不比小人所畏而亦
不忌帝庸深知決用靡疑云誰不然遽殲奪之

旣歿四年呂東萊以詩哭之曰聞人有善已伸眉倒廩
傾囷更不疑羣羣護護竟何許卷阿空老鳳皇枝又曰
胸懷北海與南溟卻要涓涓一勺清相對蹙然如重客
無人信道是門生又曰壁水經年奉宴居天和襲物自
舒徐憑誰寄謝朱公挾纔向春風坐月餘又曰先生墓

木綠成圍弟子摧頽盡掩扉大雪繁霜心已死有時清
夢尙摳衣

補員外陳少南先生鵬飛

附錄

少南性簡重言動有準自幼而孤以專志勤苦成其名
于聲利樂欲無所動其學爲通博而多識治亂在人主
左右謀議箴切皆合大體

中興藝文志曰紹興時太學始建陳少南爲博士發明
理學爲陳博士書解

林少穎尙書全解曰鄭氏以君陳爲周公之子蘇氏陳少南俱以爲非而陳少南爲詳明其言曰周公命康叔成王命蔡仲父子之苗裔見于告戒之詞者如是之審況周公叔父有大勳勞于成王命其子以繼父事何無懿親之語若言他人然決無是理也

王深寧困學紀聞曰陳少南不取魯頌然思無邪一言亦在所去乎

謝山箋曰不取魯頌亦非無義

芮氏學侶

尙書芮先生輝

芮輝字國瑞國器弟官至侍讀國史尙書嘗爲桐川簿
過倪偁曰與我遊者皆有歌詩然珠玉之賜不如藥石
之贈又曰建平吏黠民奸子何以處之曰以嚴馭吏以
恕待民奉公以勤律身以儉交同僚以誠暇日讀吾所
未見書以增其所未至先生善之淳熙九年卒

姓譜

附錄

周益公祭之曰惟公才學兼優弟兄競爽聲□膠庠評
尙鄉黨伯也先逝公譽日廣徧持使節明燭幽枉晚踐